



E son dutis veduis e a van a messe ogni matine. No tant par fede cuant che la scuse e je buine par cjatâsi e fâ une peçotade.

Di fat, fûr de glesie, e fasin tape intal bar dal Gobo e li po e tache la liende.

“Savêso che Luiggina e je plene!”, e fâs Vigje dai Faris, sotvôs.

“Cuale Luiggina?”, domande Tonie la Ruvignate.

“Luiggina dai Bintars”, interven Mariane di Bertin, “Che Luiggina dai Moros e je sterpe!”

“Ma sêstu sigure?”, vûl savê Catine la Vidule.

“Mi pâr che e à une panzute...!” e dîs Vigje dai Faris.

“E cui ise il pari?” domandin insiemi Tonie, Mariane e Catine.

“No si sa di sigûr, ma forsit al è che biel zovin riçot che al è vignût a vore li di Checo dal For”, e fâs Vigje, dute contente di jessi la prime a pandi la novitât.

“Ma cemût lu sâstu?” domande Mariane di Bertin.

«Lu ai viodût plui di une volte vignî fûr dal curtîl dai Bintars, di gnot”. Rispuint Vigje dai Faris.

Par un moment lis babis e tasin, mastiant par dentri la novitât.

Chestis babis e son cussì a cognossince dai fats dal paîs, che dispès e san lis robis prin ancjemò che a sucedin.

Cussì doman lu savarà dut il paîs. E lu savarà ancje Luiggina dai Bintars, che e je plene cence savê di jessilu.

Se daspò i domandais a la int di Luvignà di Sot ce che e fâs di mistîr Vigje dai Faris, us rispuindaran ducj:

«E fâs la Digei a Radio Peçot Internescional! ».

di Pauli Jacus (IV3IAN)